

*Inilalathala ng Partido Komunista ng Pilipinas-Bagong Hukbong Bayan sa Rehiyong Bikol*

REBOLUSYONARYONG  
PANGMASANG  
PAHAYAGAN  
NG BIKOL

Espesyal na Isyu  
Abril 2002

## Sagot sa Imperyalistang Agresyon:

# IBAYO, MATATAG AT MALAWAKANG ISULONG ANG BAGONG DEMOKRATIKONG REBOLUSYON!

**W**alang kahihiyang paglalapastangan sa pambansang soberanya, pagtataksil sa sambayanan at pangangayupapa sa imperyalismong US ang ipinamalas ng pamahalaang Macapagal-Arroyo nang pumayag ito sa tahasang armadong panghihimasok ng mga tropang militar ng US sa Mindanaw.

Walang pag-aalinlangang ibinabandera ng sabwatang Bush-Macapagal-Arroyo ang iligal na hakbanging maglunsad ng digmang agresyon sa bansa, gamit ang panabing nitong "Balikatan Exercise 02-1", na tinatawag na nito ngayong "Operation Enduring Freedom: Philippines."

Palibhasa ay parehong makikinabang, abot-tenga ang pagkakangiti ng mga pusakal sa pagkakalusot ng "pagsasanay-militar" na ito bagamat wala itong ligal na batayan maging sa makaisang-panig na Mutual Defense Treaty (MDT) at Visiting Forces Agreement (VFA), at agaran na nitong pinag-uusapan sa ngayon ang "Balikatan Exercise 02-2", na gaganapin sa Gitnang Luzon at lalahukan ng 2,665 tropang militar ng US.





**...panabay  
nang  
naghahasik ng  
mas  
matinding  
karahasan,  
pasismo at  
terorismo sa  
mamamayang  
Pilipino ang  
mga  
mersenaryong  
sundalong  
Amerikano at  
Pilipino.**

TODONG GINAWANG sangkalan ng imperyalismong US ang pag-atake noong Setyembre 11 upang maikubli sa posturang “demokratiko” at “makatarungan” ang matagal na nitong planong maglunsad ng digmang mapanalakay sa mga hangganan ng maliliit at mahihinang bansa. Dahil sa matinding depresyong dinaranas ng mga pangunahing imperyalistang bansa sa daigdig ngayon, tanging ang paglulunsad ng mga digmang agresyon, paghahandang makidigma, at malakihang gastos militar ang desperadong hakbanging binabalingan ng US upang muling ibangon ang pumapalyang ekonomya, itaguyod ang imperyalistang globalisasyon at makapanatiling nag-iisang “super power” sa mundo.

Inilunsad ng US ang isang “digmang depensibong reaksyon” sa teroristang pananalakay sa sarili nitong teritoryo. Nang lumaon, ibinaling na ito bilang isang digmang agresibong naggigiit at nagtatanggol sa imperyalistang paghahari at dominasyon nito sa buong daigdig.

Aroganteng tinukoy nito ang mga elemento, pwersa, at maging gubyrno at bansang arbitraryong pinagpapasyahan ng gubyrnong US bilang mga “terorista” o kaya ay “sumusuporta sa terorismo.” Isinama sa imperyalistang *blacklist* ang mga anti-imperyalistang gubyrno at rebolusyonaryong kilusan sa pambansang pagpapalaya gaya ng Partido Komunista ng Pilipinas (PKP), Bagong Hukbong Bayan (BHB), at National Democratic Front of the Philippines (NDFP).

Kasabay nito, malawakang naghahasik ang imperyalismong US ng mas matinding terorismo sa walang kaparis na saklaw. Tahasan nitong ipinwesto sa mga estratehikong lugar sa iba’t ibang panig ng mundo ang kanyang mga pwersa at kagamitang pandigma, laluna ang mga armas nukleyar, upang ipakita at ipadama ang kapangyarihan ng imperyalistang superyoridad.

TODONG GINAWANG sangkalan naman ng rehimeng Macapagal-Arroyo ang mga teroristang aksyon ng grupong Abu Sayaff (ASG) sa katimugang bahagi ng Mindanaw upang maikubli sa posturang “demokratiko” at “makatarungan” ang iligal nitong pagpapapasok sa mga tropang militar ng imperyalismong US sa bansa. Sa kabila ng paulit-ulit na tumitinding krisis na nararanasan ng bansa, ang pagiging sunud-sunuran pa rin sa among imperyalista ang pinapangibabaw ng rehimeng GMA upang maitaguyod ang interes nitong manatiling naghaharing paksyon ng mga mapagsamantalang uri hanggang taong 2010 na may malakas na suporta ng imperyalismong US.

Sa kumpas ng imperyalismong US, inilunsad nito ang “Balikatan Exercise 02-1” na isang panabing lamang sa armadong ➡

## Sagot sa Imperyalistang Agresyon



pangkapayapaan sa NDFP. Tahasan itong nag-isyu ng mga ultimatum at mga kundisyong lumalabag sa mga kasunduang una nang napirmahan ng magkabilang panig. Ang mga aksyong ito ay sumasalamín sa matinding pagkapapet, militarismo at militaristang pamamaraan upang sugpuin hindi lamang ang mga “terorista” kundi maging ang iba pang mga progresibong pwersang tumututol sa imperyalismo, pyudalismo at burukratang kapitalismo.

Sa ngayon, panabay nang naghahasik ng mas matinding karahasan, pasismo at terorismo sa mamamayang Pilipino ang mga mersenaryong sundalong Amerikano at Pilipino. Nakapwesto na ngayon sa tatlong malalaking grupo ng isla ng bansa ang mga sundalong Amerikanong kalahok sa kampanyang kontra-insurhensya. Ilan dito ay napapabalita nang napalaban sa mga mandirigma ng BHB sa Gitnang Luzon. Ang ilan naman ay nakikitang pakalat-kalat sa probinsya ng Sorsogon.

↩ panghihimasok ng US sa bansa. Sa “pagsasanay” na ito, ang mga tropang Kano ay awtorisadong gumamit ng tunay na bala, magpapatok upang ipagtanggol umano ang sarili, at manatili ng anim na buwan hanggang isang taon sa bansa. Ayon sa reaksyunaryong estado, ang pakay umano ng ganitong klase ng “pagsasanay-militar” ay ang Abu Sayaff na likha din lang naman ng sabwatang AFP at Central Intelligence Agency (CIA). At ang idinedeclarang kasunod na target ng pinagsanib na pwersang militar ng US at Pilipinas ay ang “mas malaki at mas mapanganib” umanong PKP-BHB-NDFP, ayon kay Heneral Angelo Reyes.

Aroganteng pinagdidiinan ng pamahalaang Macapagal-Arroyo, sa udyok ng mga militaristang pinangungunahan ni Reyes, na itigil na ang pagharap sa usapang

HINDI MASISINDAK ng anumang banta at aksyong terorista ng imperyalismong US at ng pasistang reaksyunaryong guberno ang mamamayan at rebolusyonaryong kilusan. Armado tayo ngayon ng mga aral at karanasang luwal ng matagumpay na pagsusulong ng Ikalawang Dakilang Kilusang Pagwawasto (IDKP). Mas malakas, mas matatag at mas malinaw nating nauunawaan ngayon ang malaking pangangailangang higit pang isulong ang demokratikong rebolusyong bayan laban sa mga lokal at dayuhang kaaway. Mahigpit na nagkakaisa ang buong Partido at determinado itong pamunuan ang sambayanan sa ubos-kayang paglaban sa armadong panghihimasok at banta ng digmang agresyon ng imperyalismong US. Subok at panday na sa mahigit 30 taong ➡

## Sagot sa Imperyalistang Agresyon

↳ buhay-at-kamatayang pakikibaka ang Bagong Hukbong Bayan.

Ang sabwatang aksyon nina Bush at Macapagal-Arroyo ay itinulak ng pagkabulok pa ng pandaigdigang sistemang kapital. Ang sabwatang aksyong ito ay tiyak na lilikha ng mas malaking ligalig at krisis sa bansa. Lubusang ilalantad ng armadong panghihimasok ang kabulukan ng rehimeng US-Macapagal-Arroyo at mas mahihiwalay pa sila sa malawak na hanay ng masa ng sambayanan. Tuluyang itutulak nito ang mga mamamayan patungo sa panig ng rebolusyon. At lilikhain nito ang isang napakapaborableng sitwasyon para sa rebolusyon at sa rebolusyonaryong kilusan.

MAHIGPIT NA TUNGKULIN ng Partido at buong rebolusyonaryong kilusan na tuluy-tuloy at ubos-kayang labanan ang armadong panghihimasok at banta ng armadong agresyon ng US. Kailangang malawakang ihanda at pakilusin ang mga rebolusyonaryong pwersa, gayundin ang malawak na masa ng sambayanan para matatag na labanan ang panibagong pananalakay ng imperyalismong US at mga lokal na alipures nito. Palawakin, palakasin at paigtingin ang kilusang protesta at armadong pakikibaka, palawakin at palakasin ang pambansang nagkakaisang prente, at matatag na isulong ang demokratikong rebolusyong bayan. Labanan at biguin ang armadong panghihimasok ng US at pagbayarin nang mahal ang rehimeng US-Macapagal-Arroyo sa kanilang tahasang pagkapapet at pagtataksil sa bansa.

Kagyat na bigyang-diin ang pagpapalawak at pagpapaigting ng kilusang protesta at kilusang propaganda laban sa armadong panghihimasok at banta ng armadong agresyon ng imperyalismong US, at ilunsad ang isang malawakang kampanyang edukasyon sa loob at labas ng rebolusyonaryong kilusan hinggil sa MDT,

VFA, MLSA at iba pang mga kolonyal at maka-isang panig na mga tratado at kasunduang militar sa pagitan ng US at GRP. Ilantad, labanan at ihiwalay ang papet na rehimeng US-Macapagal-Arroyo na may partikular na hagupit sa mga militaristang pinangungunahan ni Hen. Angelo Reyes.

Palawakin at palakasin ang nagkakaisang prenteng anti-imperyalista. Pukawin at pataasin ang kamulatang makabayan ng mamamayang Pilipino at itayo ang posibleng pinakamalawak na alyansang anti-agresyon na maaaring kapalooban ng mga elemento at organisasyong nagsusulong ng iba-ibang antas ng anti-imperyalismo at nagtatanggol sa pambansang soberanya at kasarinlan ng bansa.

Paigtingin ang armadong rebolusyonaryong pakikibaka sa buong kapuluan. Ihanda ang isip at organisasyon ng masa at rebolusyonaryong kilusan para sa puspusang pakikibaka sa imperyalistang agresyon. Paigtingin ang pakikidigmang gerilya, tuluy-tuloy na magpalawak at magparami ng kasapiang ang BHB at ilunsad ang mga taktikal na opensibang magdadala sa atin ng maniningning na tagumpay at karagdagang makabagong armas. Palawakin at palalimin ang baseng masa at mobilisahin sa armadong pakikibaka ang milyun-milyong mamamayan. ➡



# PANDAIGDIGANG AGRESYONG MILITAR NG US, NAKAUGAT SA IMPERYALISMONG KRISIS

Pagpasok ng ika-20 siglo, ganap nang naghahari ang imperyalismo, ang lundo ng sistemang kapitalista, sa buong daigdig. Kinakatangian ito ng paulit-ulit at papalubhang **krisis ng sobrang produksyon** at paglitaw ng mga dambuhalang monopolyo-kapitalista sa iba't ibang kapitalistang bansa. Upang masustine at makapagpalawak ang mga ito, kinailangan ng mga imperyalistang bansa na manakop upang gawing bagsakan ng kanilang mga sobrang produkto at kapital. Maliban pa rito, kailangan nila ng mapagkukunan ng mga murang hilaw na materyales para sa kanilang produksyon. Kayat hinati-hati ng mga imperyalista ang daigdig sa kani-kanilang mga sakop.



Ang hatiang ito ay hindi isang payapang kalagayan. Nagkakaroon ng alitan sa pagitan ng mga nag-aagawang imperyalistang bansa kung saan humahantong ito sa digmaan, tulad ng nangyari noong Una at Ikalawang Digmaang Pandaigdig. Pagkatapos ng Ikalawang ➡

## Sagot sa Imperyalistang Agresyon

↩ Palawakin at palalimin ang kilusang lihim sa kalunsuran at kanayunan. Doblehin ang pag-iingat sa manera ng pagkilos, pagbabase, pagtatalastasan at komunikasyon. Pakilusin ang kilusang masa bilang kontra-paniktik.

At palawakin at palakasin ang suportang internasyunal laban sa imperyalistang panghihimasok at banta ng agresyon. Kailangang higit na palawakin ang anti-imperyalistang propaganda sa ibayong-dagat.

DAPAT NATING seryusohin ang banta ng imperyalistang agresyon habang ubos-

kayang linalabanan at hinahadlangan ito sa iba't ibang paraang ligal at iligal, armado at di-armado. Tandaan nating ito ang pangunahing salarin sa pangmamasaker sa 1.4 milyong Pilipino sa digmang agresyong inilunsad nito noong 1900 sa bansa.

Dapat tayong laging maging handa sa mabilis na pagbabagu-bago ng mga kalagayang pang-ekonomya at pampulitika sa bansa at sa buong daigdig. Pabulok na ng pabulok ang imperyalismo at nalalapit na tayo sa maningning na sosyalistang bukas.

S

↩ Digmaang Pandaigdig, ang US ang lumitaw na numero unong imperyalistang bansa. Ipinatupad nito ang **neokolonyalismo** bilang reaksiyon sa pagbulwak ng mga pambansang kilusang mapagpalaya. Bunga nito, naging pangunahing kontradiksyon sa daigdig ang tunggalian sa pagitan ng imperyalismong US at mga bansa at mamamayang inaapi at pinagsasamantalahan.

### KRISIS AT AGRESYON NG IMPERYALISMONG US

Ang US ang nangungunang imperyalistang bansa at ang saklaw ng kanyang pang-ekonomya at pampulitikang dominasyon ay walang kaparis. Pagkatapos ng Ikalawang Digmaang Pandaigdig, inilunsad ng US ang *coldwar*. Nagtayo ng mga baseng militar at mga alyansa tulad ng North Atlantic Treaty Organization (NATO) at ng South East Asian Treaty Organization (SEATO) sa iba't ibang panig ng mundo upang supilin ang sosyalistang kampong pinamumunuan ng Unyong Sobyet at ang mga mamamayan sa ikatlong daigdig na lumalaban para sa pambansang kalayaan



at sosyalismo. Dinigma ng imperyalismong US ang nagrerebolusyong mga mamamayan ng Korea at Indotsina. Ngunit nabigo ito. Sinundan ito ng makasaysayang tagumpay ng Dakilang Proletaryong Rebolusyong Pangkultura sa Tsina.

Nasa resesyon ang ekonomya ng US pagpasok ng dekada 70 dahil sa malaking nawaldas nito sa bigong pakikidigma sa Asya at sa biglang pagsirit ng pandaigdigang presyo ng langis dahil sa embargo ng langis na ipinatupad ng mga bansang nagsusuplay nito. Kayat naging tutok ng imperyalismong agresyon ng US ang Middle East kung saan nakaimbak ang malaking suplay ng langis sa buong daigdig at may malakas na anti-imperyalistang sentimyento sa hanay ng mga mamamayang Muslim dito. Ang mga base sa Pilipinas at Okinawa, Japan ay ihinandang lunsaran ng pwersa sa mabilisang pagpakat (Rapid Deployment Force) na handang manghimasok sa Middle East.

Kasabay naman nito ang pagsulong ng iba't ibang rebolusyonaryong kilusan para sa pambansang demokrasya at paglaya sa Latina Amerika, Aprika, at iba pang bahagi ng Asya. Ginamit ng imperyalismong US ang taktikang *low intensity conflict*, kung saan nagpopondo at nagsasanay na lamang ito ng mga lokal na bayarang militar sa ilalim ng mga papet nitong rehimen upang sugpuin ang mga kilusang mapagpalaya (halimbawa sa El Salvador at Pilipinas).

Pagpasok ng dekada 80, nasa resesyon na naman ang imperyalismong US. Mas naging mapanalanta ang patakaran nitong neoliberalismo sa ekonomya. Kinasangkapan nito ang mga imperyalistang pormasyon at organisasyon tulad ng WTO-IMF-WB upang maipatupad ang patakarang ito. Ang mga bansang patuloy ang anti-imperyalistang paglaban ay naging target ng panggigipit sa ekonomya at pautang, at interbensiyong militar tulad ng ginawa sa ➡




# TERORISMO, TATAK NG IMPERYALISMONG US

## Ang Karanasan ng Pilipinas

**D**esperado ang US na mapanatili ang kontrol sa kanyang mga kolonya at malakolonya sa imperyalistang interes nitong mapalawig pa ang pangangamkam ng mga hilaw na materyales, pagtatambak ng kanyang mga labis na produkto, pagsasamantala sa murang lakas-paggawa, at pagkakamal ng dambuhalang tubo.

Ang pagtitiyak ng US sa pang-ekonomyang interes niya sa Pilipinas ang tunay na dahilan ng kanyang panghihimasok-militar at nakaambang malaganap na digmang agresyon. Katangian ng imperyalismo ang paggamit ng lakas-militar sa mga kolonya at malakolonya upang supilin ang mga mamamayan dito at sugpuin ang rebolusyonaryong pagkilos laban sa pang-



aapi at pagsasamantalang dulot ng papabulok na sistemang pang-ekonomya.

Tigib sa pandarahas ng US ang kasaysayan ng Pilipinas. Sa mahigit 100 taong tuwiran at di-tuwirang paghahari, naghasik ang US ng walang kapantay na ➡

### Pandaigdigang Agresyong Militar ng US

↩Nicaragua, Iran, at Angola.

Sa loob ng dekada 90, tuluyan nang nakapanumbalik ang kapitalismo sa Unyong Sobyet at Silangang Europa. Ngunit patuloy pa ring minamantini ng US ang malaking industriyang militar nito kahit wala nang makapangyarihang sosyalistang bansang humahamon dito. Mas naging agresibo rin ang patakaran nito sa ekonomya nang ipataw nito ang patakarang "malayang pamilihang" globalisasyon. Kasing-agresibo rin ang interbensiyong militar nito sa mga tumututol na bansa at mga bayang mapagkukunan ng mga estratehikong hilaw na materyales tulad ng langis. Sinalakay ng imperyalismong US ang Iraq, Balkan Peninsula, Yugoslavia at Afghanistan.

Sa pagpasok ng ika-21 siglo, ginagamit namang tuntungan ng US ang teroristang pananalakay dito noong Setyembre 11 upang ilunsad ang kanyang "gerang walang hangganan" laban sa terorismo. Walang ibang layunin ang US kundi ang pagpapalakas ng kanyang imperyalistang kapangyarihan upang malayang mapakinabangan nito ang yaman ng ibang bansa at maibsan ang resesyong kinasasadlakan ngayon. Tinatarget ng US ngayon ang Pilipinas, hindi lamang sa likas na yaman nito kundi sa estratehikong lokasyon nitong maaaring pagbasehan ng mga tropang Amerikano upang mabantayan ang muling paglakas ng Tsina na maaaring maging banta sa paghahari ng imperyalismong US sa ekonomya at pulitika.

*S*

↩ terorismo laban sa sambayanang Pilipino. Pangunahing ginamit ng US ang kontra-rebolusyonaryong dahas katulad ng pagmasaker sa mga bihag at sibilyan, pagsasamantala sa mga kababaihan, panonortyur, pagsosona, at panununog ng mga tahanan at ari-arian. Sa kabilang banda, gumagamit ito ng panlilinlang sa pamamagitan ng halimbawa ng pagbibigay ng huwad na kalayaan, paglulunsad ng mga eleksyon pagkatapos ng agresyon, at paggamit sa edukasyon, masmidya at iba pang porma ng kultura.

Ang mga sumusunod ay ilan lamang sa napakahabang listahan ng pandarahas at panlilinlang ng imperyalistang US:

☠ Sa **Digmaang Pilipinas-Amerika** (1898-1901), aabot sa 600,000 mamamayang Pilipino, kabilang ang mga bata, kababaihan, at matatanda, ang pinaslang ng mga tropang Amerikano.

Ang bilang na ito ay umabot pa sa ↗

### MGA KASUNDUANG MILITAR

#### Sa Pagitan ng US at Mga Papet na Rehimen

##### ACSA o Acquisition and Cross-Servicing Agreement

Ang ACSA ay sapilitang ipinapataw ng imperyalistang US sa iba't ibang bansa sa daigdig upang maseguro ang pagpakat ng mga tropa nito sa mga estratehikong lugar sa daigdig. Ito ay sumusuporta sa estratehiya ng pasulong na pagpakat (*forward deployment strategy*) ng imperyalismong US sa Asya at estratehiya ng mabilisang pagpakat (*rapid deployment strategy*) sa buong mundo.

Sinalubong ito ng malawakang protesta ng mamamayan noong 1992 pero palihim pa rin itong ipinatupad ng rehimeng US-Ramos. Bago nito, may dati nang pinirmahang isang kasunduang access sa Mutual Defense Board, isang komiteng binubuo ng mga kinatawan ng militar ng Pilipinas at US na nangangasiwa sa implementasyon ng Mutual Defense Treaty ng 1951.

##### VFA o Visiting Forces Agreement

Ang VFA ay ang pagpapahintulot sa pagpasok at paggamit ng mga tropang Amerikano sa mga daungan, paliparan, mga kampo at iba pang pasilidad. Tahasang panghihimasok ito sa mga panloob na usapin at paglabag sa pambansang soberanya.

Sa pamamagitan ng kasunduang ito ay pinapahintulutan ang US sa malayang paggamit ng tropang militar nito sa teritoryo ng Pilipinas samantalang ibinasura na ng Senado noong 1991 ang Tratado ng Pagkakaibigan, Seguridad at Kooperasyon na nagtangkang magpanatili sa mga baseng militar ng US.

Pinirmahan ang VFA nina Ambassador Thomas Hubbard ng US at Kalihim Domingo Siazon ng Usaping Panlabas noong Pebrero 10, 1998, bago matapos ang administrasyon ni Hen. Fidel Ramos. Pinagtibay ito ng Senado noong 1999 sa direksyon ng rehimeng US-Estrada.

##### MLSA o Mutual Logistics Support Agreement

Ang MLSA ay ginagamit na sangkalan ng rehimeng US-Macapagal-Arroyo para ilunsad ang "gera laban sa terorismo" para tuwirang salakayin ang mga rebolusyonaryo at progresibong pwersa.

Ginagawang panabing lamang ang paglulunsad ng "pagsasanay-militar" para sa direktang panghihimasok ng US sa pambansang soberanya at mga panloob na usapin. Sinimulan ang pagsasanay na tinawag na "Balikatan 02-1" noong Enero 31.

Labag sa mismong Konstitusyon ang pagpasok at pananatili ng mga tropa at kagamitang militar ng dayuhan. Ginawang tuntungan ng rehimeng US-Macapagal-Arroyo ang di-umano'y kampanyang anti-terorismo para mailusot ang MLSA kahit hindi ipinagtibay ng Senado.

Muling pinahihintulutan ng rehimeng US-Macapagal-Arroyo ang pananatili ng mga base at tropang militar ng US sa bansa. Ito ay pinirmahan nina AFP Punong Hen. Diomedio Villanueva at US Pacific Command chief Adm. Dennis Blair.

S



- ↪ 1.4 milyon hanggang taong 1913, nang manindigan ang sambayanang Pilipino na maglunsad ng rebolusyonaryong gera para sa pambansang pagpapalaya.



***Tigib sa  
pandarahas  
ng US ang  
kasaysayan  
ng Pilipinas.  
Sa mahigit  
100 taong  
tuwiran at di-  
tuwirang  
paghahari,  
naghasik ang  
US ng walang  
kapantay na  
terorismo  
laban sa  
sambayanang  
Pilipino.***

☠ Sa **Batas ng Panunulisan** sa panahon ng kolonyalismong US, itinuring na bandido ang mga mandirigmang Pilipinong nakikilaban para sa pambansang pagpapalaya. Kamatayan o mahabang pagkakabilanggo ang iginawad na parusa para sa kanila at sa kanilang mga tagasuporta.

Pinatay o ikinulong din ang sinumang nagtaguyod ng pambansang kalayaan o paghiwalay sa US kahit sa mapayapang paraan. Pinagtibay ang **Batas sa Sedisyon** para supilin ang mga nagsusulat at nagtatanghal ng mga rebolusyonaryong akda at likhang-sining. Ipinagbawal ng **Batas sa Bandila** ang paglaladlad ng bandila ng Pilipinas at pagpahayag ng mga makabayang kaisipan.

☠ Binuo ng US noong 1901 ang **Philippine Constabulary (PC)**, mga lokal na bayarang tropang mula sa kinamumuhang Guardia Civil, na kasangkapan ng mga tropang Amerikano sa pagpapalawig at pagpapalawak sa panunupil at pandarahas sa mamamayan. Ito ang ninuno ng reaksyunaryong AFP.

☠ Katulad ng ginawa nito sa tagumpay ng mamamayang Pilipino sa Rebolusyong 1896 laban sa mga Espanyol, muling inagaw ng US ang tagumpay ng sambayanang Pilipino sa digmaan laban sa Hapon. At katulad sa panahon ng pangongolonya nito, muling dinahas ang mga mamamayan at rebolusyonaryong pwera.

Bagamat natatalo na ng Hukbalahap ang mga Hapon, ang mga baryo at syudad ay pinagbobomba at kinanyon ng US at ang kalakhan ng Maynila at Cebu ay winasak.

Ang 109 na tauhan ng Iskwadron 77 ng Hukbalahap, na mas naunang nakapasok at nakapagpapalaya sa Maynila mula sa mga Hapon, ay dinis-armahan ng mga tropang Amerikano, at minasaker sa Malolos, Bulacan, habang papauwi na galing Maynila.


☠ Sa binuong **JUSMAG (Joint US Military Advisory Group)**, tuwirang kinokontrol ng US ang militar ng Pilipinas sa pamamagitan ng pagbibigay ng direksyong pang-estrategiya at pang-istap, lohistika, treyning at koordinasyon sa paniktik.

Pangunahin itong responsable sa sapilitang ↪

↪ pagpapalikas sa mga magsasakang patuloy na lumalaban mula sa maraming baryo ng Gitnang Luzon at Timog Katagalugan. Kinanyon at sinunog ang mga bahay ng mga magsasaka.

Sa Bacolor, Pampanga at sa Sta. Cruz, Laguna, at sa iba pang lugar, maraming magsasakang di-armado ang pinagbabaril, pinagbabayoneta, at minasaker ng *military police*.

☠ Naging laganap din ang pandarahas at pagsasamantala ng mga tropang Amerikano sa mahigit 23 base sa 200,000 ektaryang lupain sa mga pinaka-estratehikong lugar sa Pilipinas. Gayundin ang pagpatay kahit sa katutubong namumulot ng basura na napagkamalan daw na baboy damo at naging target sa pamamaril.



Matapos mapaalis ang mga base-militar ng US, tambak na nakalalasong basura ang iniwan nito na pumatay na ngayon ng tatlumpu't isang (31) katao.

☠ Sa disenyo ng CIA, o Sentral na Ahensyang Paniktik ng US, pinalaganap ang iba't ibang kampanyang militar katulad ng Low Intensity Conflict sa panahon ni Aquino, na siyang pinakabrutal, pinakamasahol at pinakamalaganap na kampanyang kontra-insurhensya sa kasaysayan ng Pilipinas pagkatapos ng Ikalawang Digmaang Pandaigdig.

Ito ay brutal at imbing patakaran ng paggamit sa mga Pilipino para patayin ang kapwa Pilipino at pananakot sa mamamayan sa pamamagitan ng *psywar* at maruming panloloko. Sa pagsususpetsa lamang na kunektado sa rebolusyonaryong kilusan, ang mamamayan sa kalunsuran at kanayunan ay tinatarget na imasaker, patayin, tortyurin, bombahin, sonahin at pwersahang palikasin. Ang lahat ng ito ay pananagutan ng buong rehimeng US-Aquino, pwersang militar, pulis at paramilitar pero madalas na tinatangkang ang kasamaang ito ay magmukhang kagagawan lamang ng mga pwersang paramilitar at kahit ng ordinaryong sibilyan.

Lubhang napakalaki ng utang na dugo ng US sa sambayanang Pilipino, at hindi dapat na magpatuloy at maulit ang walang kasing-sahol na terorismo ng US. Kailangang papagbayarin ng mahal ang US sa pamamagitan ng rebolusyonaryong pagkilos laban sa kanyang panghihimasok-militar at sa paglahok sa digmaan para sa pambansang pagpapalaya sa panahon ng kanyang digmang agresyon.

5